



SAOPĆENJE ZA JAVNOST

Nakon akcije ŠTIT **Pritvoreni organizatori kriminalne grupe**

Postupivši po prijedlogu Tužilaštva Brčko distrikta BiH, Osnovni sud u Brčkom odredio je pritvor četvorici osumnjičenih za neovlašteni promet opojnih droga, koji su prije nekoliko dana uhapšeni u operativnoj akciji *ŠTIT*. Organizatorima grupe za prodaju kokaina, marihuane i amfetamina I. Z. (31)* i E. S. (35)*, kao i pripadnicima grupe E. N. (37)* i A. M. (54)*, jednomjesečni pritvor određen je usljed bojazni da će uticajem na svjedoke i saučesnike ometati krivični postupak.

Protiv navedene grupe, Tužilaštvo i Policija Distrikta, u saradnji s Državnom agencijom za istrage i zaštitu (SIPA), duže vrijeme intenzivno sprovode istražne aktivnosti koje su nastavljene prije tri dana izvođenjem operativne akcije kodnog naziva *ŠTIT*, kada je lišen slobode veći broj osoba. Kako se navodi u naredbi o sprovođenju istrage, prvoosumnjičeni I. Z. i drugoosumnjičeni E.S. su prošle godine, s ciljem sticanja finansijske koristi, organizirali grupu za nabavku, prijevoz, držanje radi prodaje, prodaju i posredovanje u prodaji opojnih droga kokain, marihuana i amfetamin. Tako organizirana kriminalna grupa, kojoj su svjesno pristupili E. N, A. M, H. S*, A. H*, T. Š.* i V. M*, djelovala je na području distrikta Brčko do izvođenja akcije ŠTIT, do kada je na području distrikta Brčko prometovala najmanje deset do dvanaest kilograma marihuane i amfetamina.

Zbog opasnosti da će ponoviti krivično djelo za koje se može izreći kazna zatvora tri godine ili teža kazna i bojazni da će uticajem na svjedoke i saučesnike ometati krivični postupak, Tužilaštvo je nakon ispitivanja osumnjičenih predložilo Osnovnom sudu Distrikta da četvorici njih odredi pritvor. Određivanje pritvora predloženo je za organizatore kriminalne grupe I. Z. i E. S, ali i za E.N. i A. M, kao njene pripadnike. Prihvativši prijedlog Tužilaštva i pritvorske razloge koji se odnose na bojazan da će uticajem na svjedoke i saučesnike ometati krivični postupak, sud im je odlukom na koju imaju pravo žalbe, odredio jednomjesečni pritvor. U međuvremenu, Tužilaštvo i Policija nastavljaju koordiniranu istragu protiv osmorice osumnjičenih, koja je usmjerena na dokazivanje krivičnih djela neovlaštene proizvodnje i stavljanja u promet opojnih droga (iz člana 232 Krivičnog zakona Brčko distrikta BiH).

*Preduzimanje radnji krivičnog gonjenja prema određenoj osobi ne znači da je ta osoba zaista i odgovorna za počinjenje krivičnog djela. Prema principu presumpcije nevinosti, svako se smatra nevinim za krivično djelo dok se pravosnažnom presudom ne utvrdi njegova krivica.